



BAHASA IBAN TAHUN 6

KSSR

BAHASA IBAN TAHUN 6



RM16.00
ISBN 978-983-49-0262-9
9 789834 902629
B406013

KEMENTERIAN
PENDIDIKAN
MALAYSIA





RUKUN NEGARA

Bahawasanya Negara Kita Malaysia
mendukung cita-cita hendak:

Mencapai perpaduan yang lebih erat dalam
kalangan seluruh masyarakatnya;

Memelihara cara hidup demokrasi;

Mencipta satu masyarakat yang adil di mana
kemakmuran negara akan dapat dinikmati bersama
secara adil dan saksama;

Menjamin satu cara liberal terhadap tradisi-tradisi
kebudayaannya yang kaya dan pelbagai corak;

Membina satu masyarakat progresif yang
akan menggunakan sains dan teknologi moden;

MAKA KAMI, rakyat Malaysia, berikrar
akan menumpukan seluruh tenaga dan usaha kami
untuk mencapai cita-cita tersebut berdasarkan
prinsip-prinsip yang berikut:

**KEPERCAYAAN KEPADA TUHAN
KESETIAAN KEPADA RAJA DAN NEGARA
KELUHURAN PERLEMBAGAAN
KEDAULATAN UNDANG-UNDANG
KESOPANAN DAN KESUSILAAN**

(Sumber: Jabatan Penerangan, Kementerian Komunikasi dan Multimedia Malaysia)



BAHASA IBAN TAHUN 6

PENULIS

Medan Anak Radin
Senorita Anak Gu
Lily Nyelia Anak Daud
Lydia Anak Ungam

EDITOR

Jonathan Singki Anak Lintan
Edith Sulie Bidas

PEREKA GRAFIK

Mazlan bin Mohamed

ILUSTRATOR

Rozlin Azrar bin Abd. Azib

DEWAN BAHASA DAN PUSTAKA
KUALA LUMPUR

BAHASA IBAN TAHUN 6

PENULIS

Medan Anak Radin
Senorita Anak Gu
Lily Nyelia Anak Daud
Lydia Anak Ungam

EDITOR

Jonathan Singki Anak Lintan
Edith Sulie Bidas

PEREKA GRAFIK

Mazlan bin Mohamed

ILUSTRATOR

Rozlin Azrar bin Abd. Azib

**DEWAN BAHASA DAN PUSTAKA
KUALA LUMPUR
2019**



**KEMENTERIAN
PENDIDIKAN
MALAYSIA**

No. Siri Buku: 0022

KK 3728-1161-00262-2104

ISBN 978-983-49-0262-9

Cetakan Pertama 2015

Cetakan Keempat 2019

© Dewan Bahasa dan Pustaka 2015

Hak Cipta Terpelihara. Tidak dibenarkan mengeluarkan mana-mana bahagian artikel, ilustrasi, dan isi kandungan buku ini dalam apa jua bentuk dan dengan cara apa jua sama ada secara elektronik, fotokopi, mekanik, rakaman, atau cara lain sebelum mendapat izin bertulis daripada Ketua Pengarah, Dewan Bahasa dan Pustaka, Peti Surat 10803, 50926 Kuala Lumpur, Malaysia. Perundingan tertakluk kepada perkiraan royalti atau honorarium.

Penerbit:

Dewan Bahasa dan Pustaka,

Jalan Dewan Bahasa,

50460 Kuala Lumpur.

Telefon: 03-21479000 (8 talian)

Faksimile: 03-21479643

Laman Web: <http://www.dbp.gov.my>

Reka Letak dan Atur Huruf:

Dewan Bahasa Pustaka

Muka Taip Teks: Azim

Saiz Muka Taip Teks: 14 poin

Dicetak oleh:

Percetakan Nasional Malaysia Berhad,

Jalan Tun Abang Haji Openg,


93554 Kuching,

Sarawak.

PENGHARGAAN

Penghasilan buku teks ini melibatkan kerjasama banyak pihak. Oleh itu, pihak penerbit merakamkan penghargaan dan terima kasih kepada semua pihak yang telah bersama-sama memberikan sumbangan sehingga buku ini sempurna diterbitkan. Sekalung penghargaan dan ucapan terima kasih ditujukan kepada semua yang berikut:

- Jawatankuasa Penambahbaikan Prof Muka Surat, Bahagian Buku Teks (BBT), Kementerian Pendidikan Malaysia (KPM)
- Jawatankuasa Penyemakan Pembedulan Prof Muka Surat, BBT, KPM
- Jawatankuasa Penyemakan Naskhah Sedia Kamera, BBT, KPM
- Penyelaras Projek dan Pegawai Teknikal BBT, KPM
- Bahagian Pembangunan Kurikulum, KPM
- Jawatankuasa Peningkatan Mutu, Dewan Bahasa dan Pustaka (DBP)
- Panel Pembaca Luar, DBP
- Editor Pembaca Prof, DBP
- Jabatan Pendidikan Negeri Sarawak
- Bank Negara Malaysia
- Yayasan Kebudayaan Dayak
- Taman Negara dan Rizab Semulajadi Sarawak
- Semua pihak yang terlibat secara langsung atau tidak langsung dalam menjayakan penerbitan buku ini.



Pelasar Jaku iv
Penerang Ikon v
Lambar Pemungkal vi

Unit 1: Pengaya Menua I
Unit 2: Pesaka Menua Ungkup Semua 9
Unit 3: Betuah Belimpah 17
Unit 4: Wi Tampung Tali, Rutan Tampung Danan 25

Unit 5: Cherita Nyadi ke Teladan 33
Unit 6: Pengeliat Ati Mai Pemujur 43
Unit 7: Sama Ngaling Sama Minching 53
Unit 8: Sedada Sama Seati 65

Unit 9: Asil Pengelandik Jari 77
Unit 10: Mimit Diserepiti, Mayuh Ditaruh 89
Unit 11: Angin Oh Angin 103
Unit 12: Palan Pengumbai Temuai 117

PELASAR JAKU

Bup teks *Jaku Iban Primari 6* tu betemaka pengidup siga ti mungkur utai idup enggau utai tumbuh. Bup tu ngundan dua belas unit ti diara nitihka tema ti udah ditetapkan. Bup tu digaga nitihka langkah rapat kurikulum ti betukuh modular betatika pengelandik enggau sistem jaku baka: mending enggau bejaku, macha, nulis, bungai jaku enggau jalai jaku. Tetiap unit mega ditagaka aktiviti sereta latih ke mungkur pengelandik enggau sistem jaku ke udah dipelajarka. Ba pengujung siti-siti unit bisi disempulangka pengukuh enggau tisih.

Kelimpah ari nya, bup teks *Jaku Iban Primari 6* tu mega ngundan elemen pengisi kurikulum baka ke diterangka dalam Dokumen Standard Kurikulum dan Pentaksiran enggau Tisih. Pengisi elemen dikena nyendiaka nemiak napi pengidup ke balat enchabar kemaya hari tu. Elemen ti bisi dalam pengisi kurikulum baka penemu, ukur pemanah, patriotisma, atur sosio daya idup enggau pengelandik beukur tambah. Elemen ti dirintaika dalam pengisi kurikulum tu dikena nyatup peneka Kurikulum Jaku Iban Primari 6.

Pengelandik beukur tambah ti tebal agi dipasukka dalam bup teks tu iya nya pengelandik bepikir tikas tinggi. Pengelandik tu dikarapka ulih meransang nemiak bepikir ngena penemu sereta nyerenih lebuw beperagam. Nemiak mega ditarak ngena pengelandik ti tau dikena mutarka penanggul, nentuka pemutus runding, nempa inovasyen enggau pengelandik nengkebang. Ngena peneleba diri enggau pengelandik bepikir tikas tinggi, nemiak ulih bepikir ngelui ari rampa runding sida.

Aktiviti enggau latih dalam bup tu ulih meransang nemiak mansutka buah runding ngena kar segala rata (*circle map*), kar gelembung (*bubble map*), kar sukung (*brace map*), kar gelembung gandin (*double bubble map*), kar berurun-rurun (*multi-flow map*), kar rurun (*flow map*), kar titi (*bridge map*) enggau kar kayu (*tree map*). Bup teks tu dikarapka ulih nyadi siti ari kereban ti ulih mantu proses belajar enggau ngajar kelimpah ari kereban bantu ti bukai.

Berintai tapang tinggi bekejuau
Kenyalang terebai ngelawa tansang
Penemu berguna nyadi ke tenggau
Ngerandang jalai nuju pemansang.

PENERANG IKON



Unit

Ikun lumur lambar pemungkal tetiap unit.



Aram Mending enggau Bejaku

Pengelandik mending enggau bejaku nyadi fokus belajar dikena narak pengelandik mending, meretika pekara ti didinga lalu dikena matih pengelanchar bekomunikasyen serta berinteraksyen ngena chara ti menyana.



Aram Macha

Standard macha dikena matih pengelanchar macha ngena intonasyen ti betul belalauka tanda bacha.



Aram Nulis

Pengelandik tu nyadi fokus pelajar dikena narak pengelandik nulis bepelasarka penemu enggau peneleba.



Jalai Jaku

Standard jalai jaku nyadi fokus pelajar dikena ngajar pengelandik jalai jaku ti ngundan leman, raban enggau tukuh jaku.



Bungai Jaku

Bungai jaku nyadi fokus pelajar dikena narak pengelandik leka main, jaku sempama, guna jaku sereta beperindang sambil belajar.



Pengukuh

Pengukuh tu ngundan:

- Seridi – Dikena nyaup sereta ngiring nemiak ti lubah nerima pelajar.
- Pengaya – Dikena nambah sereta ngayaka agi penemu nemiak ti pandai.



Tisih

Dikena nisih nemiak ba pengelandik ti ditarak ba unit nya tauka nyengkaum unit ti udah.



Penyedal

Penyedal dikena mantu nerangka sekeda pekara ti bisi dalam pengelandik nya.



Lumur Standard Pelajar

Ngundan fokus enggau fokus sangking ti beguna bendar dikena pengajar ngaga langgur ngajar lalu narak nemiak.



Lumur Lambar

Dikena ngayanka lumur lambar dalam bup teks tu.



LAMBAR PEMUNGKAL

SK Batu Burak jelai rita
Rampa menua badas ditimpai
Selamat betemu selamat bekelala
Ngarapka mujur bulih pemandai.



Pengaya Menua



Aram Mending enggau Bejaku

Jenaing baru pindah ngagai Sekolah Kebangsaan Batu Burak. Keluluka randau di baruh tu.

Jenaing : Manah amat rampa menua ngelingi sekula tu.
Peda seduai bukit nyin, nyau burak bebendang.

Apai : Oh, nyin! Nya batu kapur, Dom. Bukit nya mih ti benama Batu Burak. Nama sekula tu ngambi nama bukit nya.

Indai : Taman negara nya, Dom. Pengidup siga ti bisi dia dijaga perintah lalu enda tau dikachau.

Apai : Bah, aram kitai ngeripot nuan dulu, Dom.

Indai : Din lagi enti kepala pengajar nanya, saut enggau manah.

Jenaing : Au, indai. Aram mih kitai kin.



1. Sebut jaku pesan dalam randau di atas. Uдах nya, beri respons ngagai jaku pesan nya tadi.
2. Beri chunto sekeda pengidup siga ti dijaga perintah.
3. Nama pengawa ti ulih nasalka pengidup siga ba taman negara?
4. Ba runding nuan, nama kebuah pengidup siga ba taman negara enda tau dikachau?



Bepelasarka peneleba, tulis jaku pesan nitihka situasyen di baruh tu ngena tanda bacha ti betul.

	Situasyen	Jaku Pesan
a.	ba hospital	
b.	ba librari	
c.	ba taman negara	





Aram Macha

MIRI- Perintah Sarawak deka netapka 10% ari tanah ti semak kandang negeri nyadi tanah simpan dikena ngaga taman galau asal. Naka ke diatu, Kem Piasau udah digaga nyadi taman galau asal. Tuju numbuhka taman galau asal ba Kem Piasau tu dikena nyaga pengidup mayuh bansa burung kelebihan agi burung kenyalang. Nitihka pansik, bisi 45 spesies burung siga ditemu dia. Kelimpah ari nya, mayuh bansa engkatak, tupai, kesulai enggau utai tumbuh mega bisi ba taman tu. Di Bandaraya Kuching, sebagi ari kandang negeri semak Astana Negeri diperambu nyadi rizab taman galau asal. Pengawa tu mega deka dikerembai ngagai negeri bukai baka Sibu enggau Bintulu. Taman ti bansa tu endang ulih nyadi ke palan pengenduh pengidup siga lalu ulih nyadi palan pengelantang ati orang ke diau mangkang negeri. Ari nya, sida ulih meda penyelai enggau pemanah pengidup siga ke bisi di menua kitai. Taman tu mega nyamai dilawa temuai ari menua bukai ke datai enda lama ngagai menua tu.

(Dibali ari: 10% Kawasan Bandar Sarawak Rizab Taman Semulajadi, ww1.utusan.com.my)



AKTIVITI

1. Pejurai lalu tuliska isi enggau isi sukung ke dibuntis ari teks.
2. Kerandauka dalam raban, nama penyadi enti pengidup siga enda dijaga enggau manah? Bantaika penemu nya ngena kar berurun-rurun.


LATIH

1. Saut tanya di baruh tu belalauka teks di atas.
 - a. Dini endur berita di atas tu nyadi?
 - b. Nama tuju Kem Piasau tu digaga nyadika taman galau asal?
 - c. Rintaika utai idup ti bisi dalam taman galau asal nya?
2. Ba penemu nuan, nama kebuah pengawa ngaga taman galau asal deka dikerembaika ngagai negeri bukai?




Aram Nulis

Bacha notis di baruh tu.



1. Kelala bagi ayat tunggal enggau ayat turu ti bisi dalam notis di atas.
2. Gaga ayat turu ngena jaku penyambung ti bukai kelimpah ari ti bisi dikena dalam notis. Tulis ayat nya ngena urup blok enggau urup mit.
3. Kerandauka empas ulah mensia ngagai rampa menua bepelasarka gambar di baruh ngena kar gelembung gandin.



1. Ba runding nuan, nama chara ti patut dikena nyaga rampa menua enggau pengidup siga.
2. Tuliska penemu nuan nya ngambika nyadi siti karang ngena tulis chelak tauka tulis tampung. Beri topik ti engkeman ngagai karang nya.





Jalai Jaku

Jaku Penyambung Tunggal

Tu glosari ti ditulis Suraya, bakih Jenaing. Ayat ti dikena nerangka reti nya bisi ngundan jaku penyambung tunggal.

No.	Leka Jaku	Reti
1.	kampung dalam	Kampung tuai ti enda kala diperimba sereta jarang ditujuh mensia.
2.	kampung galau	Kampung ti dijaga ngena undang-undang perintah lalu asil ditu enda tau ditebang tauka diambil.
3.	pengerang	Temuda ti enda dipumai ari tujuh ngagai lapan taun.
4.	rimba	Kampung asal ti dipumai.
5.	temuda	Tanah enggau babas ti udah dipumai.



1. Perati lalu kerandauka leka jaku di atas.
2. Kelala jaku penyambung tunggal dalam glosari di atas.
3. Nama kebuah mensia berimba suba?
4. Ba runding nuan, nama pemanah bisi kampung galau?



1. Kelala jaku penyambung tunggal ti bukai lalu isi dalam kar gelembung.



2. Gaga ayat turu ngena jaku penyambung tunggal ti udah dipilih nuan di atas.
3. Gaga ayat tunggal ari ayat turu di baruh tu.
 - a. Lawai enggau Ah Meng bemain bol ba padang sekula kemari.
 - b. Kami neruska pejalai ngagai wung nya enti ujan teduh.
 - c. Diatu Jang udah mujur dalam pengidup tang iya enda tinggi idung.





Jalai Jaku

Atur D-N

Bacha penerang di baruh tu.

BERITA AKTIVITI KELAB

Kelab Rampa Menua SK Batu Burak bisi ngatur program nemuai sambil belajar ngagai Taman Negara Kebawai. Sapa ti deka enggau nemuai dipinta ngambi pom ari sekretari kelab. Pom mesti disain apai indai lalu disempulangka salin surat pengada enggau gambar besaiz pasport. Pom ti udah diisi mesti dianjung enda laun ari 2 Februari 2016 ngagai Pengajar Jura. Penerang ti silik tau ditanya ngagai sekretari kelab iya nya Timai Anak Ansok ba telefon 014-2345678 tauka emel ngagai timai@yihaa.com.

Timai
(Timai Anak Ansok)



1. Kelala lalu tentuka bagi pekara ti diterang enggau rambai jaku ti nerangka pekara nitihka atur D-N.
2. Ba penemu nuan, padahka kebuah pom nya mesti disain apai indai?



1. Nuan bisi ati deka enggau masuk program nya. Tulis infomasyen bepelasarka penerang di atas ngambika bisi dikena nerangka program tu ngagai apai indai nuan.

1.	Nama Program: ...
2.	Kelab Pengatur Program: ...
3.	Pengajar Penyempulangk: ...
4.	Sekretari Kelab: ...
5.	Dokumen ti disempulangka enggau pom: ...



2. Tulis surat pekirum rama ngagai bakih nuan ti nyeritaka perambu program kita. Padahka penguntung ti disadang ari ke masuk program tu.





Bungai Jaku

Kelab Rampa Menua SK Batu Burak bisi nemuai ngagai taman negara ke enda jauh ari sekula sida. Dia bala sida enggau temuai bukai diberi penerang senentang undang-undang ngena sada geliga ari siku pemesai ba taman negara nya.

Selamat datai bala temuai
Ba Taman Negara Kebawai
Baik ke ari menua tu tauka menua bukai
Sebedau bejalai dulu aku deka berdiri
Madahka undang-undang ti udah ditegi
Enti kita rembus kitu wai menyadi
Meda pun bebungai ba tangkai
Anang lalu dipatahka deka dibai pulai
Laban nya diungkapka kitai
Ngagai nemiak ti deka datai
Sema kita bejalai nerasa kampung puang
Tepedaka raras selangan melintang
Enda ibuh nguji deka nebang
Kapa enda tumbuh ngeninggi tapang
Bejalai kita wai pangan nengah sepan
Bepansa enggau jelu sebelah menalan
Anang mih lalu ngetan panjuk sebelah emperan
Enggaika pupus lus enda apus jeman

Enti tepedaka burung ruai sebelah tanah
Anang mih kita lalu gidan taja pan manah
Nangika jemah ila pulaika penusah
Nemiak mina ngelala ngena teknologi pemadah
Baka nya mih kita bala rebak baru
Enti kita pulai ke pelilih menua diri empu
Anang rindang lama udu
Mupuk besaup nibarka penemu
Belabuh nudukka mangkuk pesaka
Nirika pintu seribu guna
Nesau mensia selampur dunya
Sama nyaga sayauka rampa menua.



AKTIVITI

1. Sadaka entelian leka main di atas ngena intonasyen geliga ti engkeman.
2. Kelala jaku tangkan ti bisi dalam teks nya.
3. Kerandauka enggau lenak reti ayat ti bechura mirah dalam teks.
4. Ba penemu nuan, baka ni penatai temuai ngagai taman negara ulih mai penguntung ngagai ekonomi menua kitai?

LATIH

1. Nama kebuah temuai dulu diberi jaku tangkan?
2. Rintaika jaku tangkan ti bisi dalam teks di atas.
3. Tuliska bansa pengidup siga ti bisi dalam teks nya ngena kar kayu.
4. Peragamka pemesai guna teknologi pemadah enggau komunikasyen ngagai pengidup kitai kelimpah ari ke dipadah dalam teks nya.



Pengkukuh


Seridi

Gaga ayat tunggal enggau ayat turu bepelasarka gambar di baruh tu.



Pengaya

Bacha teks di baruh tu lalu saut tanya ti nangkanka nya.



Palan Pengenduh Jelu Siga Matang digaga ba Taman Negara Kubah. Seraka palan pengenduh tu ari Bandaraya Kuching semina kira-kira 35 kilometer. Palan tu dibungkur kampung ujan tropika ti besai, indah enda baka rumah jelu siga. Program latih bisi dipejalaika untkup jelu mayas. Mayas ti enda regas tauka bisi timpang pendiau diberi latih ngambika sida ulih ngidupka diri dalam kampung.

(Dibali ari: <http://www.tourism.gov.my.pusathidupanliarmatang>)

1. Kelala lalu tulis rambai jaku nitihka atur D-N.
2. Giga ayat turu dalam teks nya.
3. Nama reti leka jaku timpang pendiau?
4. Nama kebuah palan pengenduh tu indah enda baka rumah jelu siga?
5. Nama penyadi bala mayas tu enti nadai digaga palan pengenduh?





Tisih

1. Isi lapang ngena jaku penyambung tunggal ti engkeman.



“Dani! Dani! Mati kitai lagi ... enda pindah,” ku apai ngerak kami ti benung tinduk jenak.

“Mindah kini? Ke bukit ... ke lebak?” tanya indai sambil ngilikka pala.

“Nama kebuah pindah?” ku madi indu aku baka ti deka nyabak ... takut ... tekenyit.


Apai lalu enda nyaut ... iya majak ngerak bala kaban bukai ti sama bela diau dia. Bala kami begau, bisi ke engkaing, kerah-kerah, ngakak ... macham munyi ke bukai. Enda lama udah nya apai pan bejaku.

“Aram pindah. Dinga kita munyi lipan enggau tinso. Kenu ku berita bisi arang batu ditu, bala anak mensia deka ngelimbang ditu.”

Kami pan bekejang begigaka taman negara. Suah amat kami udah pindah.



2. Tulis jaku tangan bepelasarka gambar di baruh.





Pesaka Menua Ungkup Semua



Aram Mending enggau Bejaku

Keluluka randau Suraya enggau Ah Meng di baruh tu.

Amat beresi
sungai tu. Ai ga chiru.
Manah amat alai
memarin.

Nya alai kitai patut
selalu nyaga pemerisi
enggau pemanah rampa
sungai tu.

Amat nih. Bala temuai ari
menua bukai tentu
deka datai memarin kitu.

Endang amat ku nuan.
Sama-sama mih kitai besaup
nyaga pemerisi enggau
pemanah iya.

AKTIVITI

1. Betanya saut senentang pekara ti dikerandauka di atas.
2. Nama penyadi ai sungai kitai enti enda dijaga enggau manah?
3. Ba penemu nuan, baka ni kitai tau bulih penatai pemisi ari sungai?
4. Ngena chara beraban kerandauka bansa utai tumbuh belalauka gambar di atas. Udah nya, bantaika asil randau ngena kar kayu ba mua kelas.

LATIH

1. Rintaika empat chunto utai tumbuh ke bebatang enggau berandau.
2. Tulis bansa utai idup ke bisi ditemu nuan ba gambar di atas.






Aram Macha



Bacha teks di baruh tu ngena intonasyen ti betul.

Kaban Kelab Rampa Menua SK Batu Burak bisi nemuai ngagai Taman Negara Kebawai. Kami diuluka dua iku pengajar. Tuju penemuai kami dikena ngulihka penemu enggau peneleba senentang bansa utai tumbuh enggau utai idup. Sebedau bejalai nengah endur nya, kami diberi penerang senentang atur ke bisi ba Taman Negara Kebawai. Siku ari pemesai ba taman nya meri brosur ngagai kami ke malin enggau tanda pengingat.




Ba taman nya mayuh bendar pun kayu ti tinggi gegiau sereta bebesai. Pun kayu ti rinda ngasuh endur nya lindap lalu nyamai alai ngenduh. Rutan tumbuh galak niki nyerangkap kayu. Kulat tumbuh ngachir ba sebelah tanah enggau kayu ke udah repuk. Buah kayu nyau becherira mansau nelipan. Kami tekait ati meda pemanah spesies puk yuk ti bechura surik gadung enggau mirah jerenang.

Kepuas ke bejalai, kami lalu rembus ba sebatang sungai. Kami rindu meda ikan nyemerai dalam ai sungai ti chiru sereta beresi. Tekura ngerayap belubah ensuruk ba selepak bandir. Ba tebing sungai mayuh utai tumbuh baka tubu, paku, riang enggau keladi. Utai tumbuh ditu enda tau diambi tauka diayahka senepneka ati.



Kera bejlangkit di puchuk kayu sambil begigaka pemakai. Burung kenyalang manah amat dipeda terebai ngelayang. Landak bejalai rayap-rayap ba atas tanah. Tengiling ngulung diri baka buah bol tepedaka kami datai. Sekeda jelu tu deka panas enti sema enda dijaga tauka diintu enggau manah. Nya alai, pengawa ti ngasu enggau bejualka jelu siga endang ditagang nitihka undang-undang penyaga jelu siga.

Penemuai kami ke sekali tu ukai semina ngerinduka ati tang mega ulih ngerapitka kaul antara kaban kelab enggau pengajar. Sebedau mupuk, kami betabi jari lalu meri terima kasih ngagai pemesai Taman Negara Kebawai ke udah kiruh nyambut penatai kami enggau adat basa. Kami enda jera nemuai ke taman tu dudi hari ila.



AKTIVITI

1. Kelala lalu bacha ayat tunggal enggau ayat turu ke bisi dalam teks.
2. Gaga ayat tunggal enggau ayat turu ke bukai ngena leka jaku diri empu.
3. Nama penguntung kitai nemuai sambil belajar? Gaga kar gelembung dikena mantaika penemu nuan.
4. Ba penemu nuan, nama kebuah sekula ngatur aktiviti nemuai sambil belajar?

LATIH

1. Tulis lima iti ayat tunggal enggau lima iti ayat turu ke bisi dalam teks.
2. Tulis lima iti ayat turu ngena leka jaku penyambung ti disediakan di baruh tu ngena jaku diri empu.

tauka

seraya

tang

enggau

sambil






Aram Nulis

Teks di baruh tu nerangka senentang jelu nya.



Tengiling sebansa pengidup siga ti diau dalam kampung. Tengiling sebansa jelu ti betisik. Tisik iya tebal sereta kering. Tengiling tu jelu mamalia. Iya betulang belakang, bedarah panas, beranak, nyaga sereta nusuka anak.

Pemakai tengiling semut enggau sampuk. Iya nangkap semut ngena junggur ti munchung enggau jelur dilah ti panjai. Iya ngebuk sarang semut ngena kukut ti tajam dikena ngulihka semut. Tengiling ngiga pemakai malam hari baka entambah.



Habitat iya dalam lubang kayu tauka tanah. Tengiling bisi chara nyaga diri ari diserang munsuh. Lebuah betemu enggau munsuh iya nemu begulung. Gelung tubuh iya rat dibuka. Kelimpah ari nya, iya mega landik belalai dalam babas dikena nyaga pengelikon diri. Jelu tu deka majak lus enti sema enda dijaga enggau manah.

(Dibali ari: <http://ipk.umt.edu.my/?portfolio=kaji-selidik-tengiling-malaya&lang=ms>)



1. Kelala lalu tulis ayat topik enggau ayat penerang ti bisi dalam teks.
2. Ba runding nuan, nama kebuah tengiling ngulung diri maya betempuh enggau munsuh.



Tulis ayat topik enggau ayat penerang pasal jelu ke bucai.





Jalai Jaku

Jaku Penyambung Berentayan



Pemesai Guna Buluh

Buluh tu siti bansa utai tumbuh ti mayuh macham guna. Iya tumbuh ba tanah emperan, kaki bukit enggau tebing sungai.


Sekeda orang bekenaka buluh ngaga mayuh macham kereban dikena beridup. Buluh ke tebal sereta tan manah digagaka ramu rumah, geladak, dinding, lalau tangga, tiang langkau umai enggau ti bukai. Nambahka nya, buluh mega dikena orang ngaga rakit. Menya orang ke diau semak sungai suah mindah ngena rakit. Kemaya hari tu kitai mega suah meda orang ngatur pekit lumba rakit di sungai.

Buluh mega ngasilka pemakai ke kitai mensia enggau jelu. Tubu buluh tau ke engkayu. Sekeda ari engkayu ti digaga ari tubu nya baka achar, kasam enggau jeruk. Tubu mega dikena ngulai dagin, ikan tauka jukut.

Kelimpah ari nya, orang suah bekenaka buluh nyumai pemakai. Ambika banding, buluh dikena mansuh dagin, ikan, sayur enggau ngelulun asi pulut.

Dalam industri asil pengelandik jari buluh beguna bendar dikena ngaga mayuh perengka muzik, tabung duit, kelapung kunchi enggau ke bukai. Buluh tu mega ukai semina dikena ngaga kerungan manuk, sangkar burung enggau bubu tang mega tau nyadika teresang. Dalam pengawa begawai orang Iban begunaka buluh ngaga teresang ti dikena nyimpan kereban piring.

Taja pan menua udah mansang, kitai mega tetap begunaka buluh dalam ngereja sesebengkah pengawa. Buluh endang bekaul rapat enggau pengidup kitai. Nya alai, kitai patut ngembuan penyayau ke buluh.



AKTIVITI

1. Kelala jaku penyambung berentayan bepelasarka teks di atas.
2. Padahka nama guna buluh ke bukai ngena kar segala rata.

LATIH

1. Tulis ayat ngena leka jaku penyambung berentayan di baruh tu.

taja pan

ukai semina

tang mega

udah nya

2. Tulis karang pandak senentang guna buluh dalam daya idup ngena tanda wachana ti engkeman.





Bungai Jaku

Sadaka dindang di baruh tu ngena aksyen enggau intonasyen ti betul.

*Bukit Santubong tampak rita
Dikelala orang serata dunya
Jelu siga mesti dijaga
Laban nya pesaka menua*

*Bejalai jauh matau menua
Bebai kaban ngena kerita
Rindu ati sereta gaga
Bayam pemanah rampa menua*

*Bulan terang semepat bekepeli
Bintang kebelik di langit mingkai
Utai tumbuh anang dipenyati
Mayuh guna ke pengidup kitai*

*Bungai kenunsung bechura mirah
Nyadi lambang menua Malaysia
Pesaka menua dijaga enggau manah
Meruan dikayam dipeda menyana.*



1. Betanya saut senentang isi dindang.
2. Kelala lalu kerandauka leka jaku ke besenimbal enteli dalam dindang.
3. Ba runding nuan, nama aktiviti ke patut diatur dikena nyaga pemanah rampa sekula?
4. Ngena chara beraban karang siti dindang ngena komputer bermalinka tema pemanah rampa menua. Bantaika dindang nya tadi ngena LCD.



1. Tulis leka jaku ti besenimbal enteli ti bisi ditemu nuan dalam dindang di atas.
2. Giga reti leka jaku di baruh tu ngena diksihari lalu gaga ayat ngena leka jaku nya.

pesaka

dipenyati

matau

dikayam

menyana



Pengukuh

Seridi

Gaga ayat tunggal belalauka gambar di baruh tu.



.....



.....




.....



.....

Pengaya

1. Tulis chara nyaga pemanah rampa menua ngena kar gelembung.



2. Karang dua genteran dinding bemaalinka tema pemanah rampa menua.





Tisih

A. Bacha ayat di baruh tu. Pilih saut ti betul.

1. Kami serumah ngerupan meresi sungai ... lemai.
a. semina c. nyentuk ke
b. lebu d. enti
2. Aki enda nyadi nurun nginti ... ujan sangat.
a. laban c. semadi
b. lalu d. sereta
3. Pengajar Jura ... nemiak benung kiruh ngias kelas.
a. seraya c. enti
b. enggau d. lebu
4. Nemiak rebak baru diatu patut ngembuan asai ati ti siru ... sayauka rampa menua.
a. sambil c. sereta
b. tang d. ngambika
5. Mayas nya sebansa jelu ti majak lus ... iya dijaga ngena undang-undang perintah.
a. nangkanka nya c. nya alai
b. tambah mega d. entudika nya
6. Ah Meng ... landik becherita ... pandai ngaga karang dalam jaku Iban.
a. taja pia ... tang mega c. agi mega ... taja pan
b. ukai semina ... tang mega d. udah nya ... tang lalu

B. Gaga ayat ngena leka jaku penyambung berentayan di baruh tu.

1. taja pan
2. nambahka nya
3. nya alai
4. ukai semina
5. udah nya
6. keterubah iya
7. entudika nya
8. nambahka nya





Betuah Belimpah



Aram Mending enggau Bejaku

Keluluka randau di baruh tu.

Jenaing enggau bakih iya Banyai benung nginti ba Sungai Kara. Maya nya benung tengah hari nampun.

Bah, bisi udah ngait ginti nuan unggal?

Manah mih nya tang hari tu dah tinggi endar. Aruh ga perut aku tu tak asaika dikeramak bayak. Bah, enda ngetu dulu tua!

Au mih.

Em ... bisi ga tu!

Au, am mih sama nyerungkai bekal dikena tua ngelapis perut.

AKTIVITI

1. Kelala lalu kerandauka bagi tuduh penemu dalam randau di atas.
2. Giga sempama bukai ti bisi kaul enggau pengawa begiga.

LATIH

1. Giga reti jaku sempama ti bisi ditemu dalam randau di atas lalu gaga ba kar titi.
2. Baka ni chara nemiak dua iku di atas nya napi penanggul enti seduai nadai mai bekal?





Aram Macha

Bacha cherita di baruh ngena intonasyen ti betul nitihka tanda bacha.



Dulu kelia, bisi siku raja ti **tebilang** bendar. Nama iya Raja Merom. Iya enggau bini iya bisi siku anak dara ti bajik amat. Semua orang bujang keran ati deka jadi enggau anak dara raja laban meda pemajik gamal iya.

Raja Merom bisi **ngeletak** adat sereta peminta ke tinggi ngagai orang ke **keran ati** deka ngambi anak iya ke bini. Orang bujang ke tau nyadi menantu iya mesti orang ke berani ngambi anak iya ari meligai ke tinggi.


Mayuh chara iya nguji pemerani orang ke deka nyadi menantu iya. Iya ngengkah siku jelu singa ba **pintu penama** meligai. Meligai nya nadai tangga sereta nadai jalai bukai dikena niki ke atas.

Mayuh orang bujang udah nguji tang mih sida enda mujur niki ke atas. Sekeda sida ti ulih ngenataika diri di atas lalu mantul. Sida takutka singa ti nyaga pintu penama bilik endur anak dara raja ke **diumbung**.

Mayuh bala bujang nyengkaum bala anak raja ari menua jauh nguji deka ngambi anak dara tu. Siku ari anak raja tu, benama Raja Limbang. Anak raja tu bisi kereban ajih. Iya bisi kasut, baju enggau sayap ajih. Iya nengkira sereta lalu ngerasukka kereban ajih iya. Iya pan begadai-gadai niki ke atas ngena kasut ajih iya. Enda berasai iya pan datai **di legit** endur anak dara raja nya diau.

Iya bisi engkerabun. Iya ulih nyeliahka diri ari ti dipeda singa ke nyaga mua pintu meligai nya.

Raja Limbang ulih ngumbuk ati anak dara Raja Merom. Anak dara raja nya pan setuju deka nitihka Raja Limbang nurun ke baruh. Raja Limbang lalu nabanka anak dara raja nya ngena sayap ajih. Raja Limbang mujur **napi penguji** ke udah





diletak raja ngagai orang ti keran deka jadi enggau anak dara iya.

Ari pengeran ati, dia Raja Limbang ulih jadi enggau anak dara Raja Merom ti chukup bajik.

AKTIVITI

1. Bepelasarka cherita ti udah dibacha nuan, kerandauka:
 - a. Watak enggau tempat.
 - b. Pekara ti ngerinduka ati nuan dalam cherita tu.
 - c. Ba penemu nuan, baka ni asai ati anak dara Raja Merom lebuah iya dibai Raja Limbang terebai ngena sayap ajih?

LATIH

1. Beri reti leka jaku tauka rambai jaku ti bechura mirah dalam cherita.
2. Saut semua tanya di baruh tu ngena ayat penuh belalauka cherita.
 - a. Nama kebuah sida ke bujang berebut deka jadi enggau anak dara Raja Merom?
 - b. Nama adat enggau peminta ti diletak Raja Merom?
 - c. Baka ni Raja Merom nguji pemerani orang ti deka jadi enggau anak iya?
 - d. Padahka chara Raja Limbang mujur ngambi anak dara Raja Merom?
3. Perundingka perengka ajih ti dikinginka nuan. Padahka nama kebuah nuan inginka perengka ajih nya.
4. Enti sema nuan penulis cherita tu, nama topik ti deka diberi nuan ngagai cherita di atas?





Aram Nulis

Bacha lalu peratika tibak jaku ti dipansutka Tuan Opis Menteri Pelajar Malaysia lebu ti bejadi Pengerami Lumba Darat SK Batu Burak.

Selamat pagi, iya ti dipebasaka Kepala Pengajar SK Batu Burak Mr. Anthony Abun, Chairman Gerempung Apai Indai Nembia enggau Pengajar, Tuai Rumah Engkaul, bala pengajar, bala apai indai enggau bala nembia.

Keterubah tu, aku meri besai terima kasih ngagai sekula tu laban udah ngangauka aku bejadi lumba darat taun tu.

Lumba darat tu siti ari aktiviti kokurikulum ti deka diatur ninting taun. Diatu Opis Menteri Pelajar Malaysia benung bejalaika program Siku Nembia Siti Lumba. Nengah program tu bala nembia diperansang ngambi bagi dalam lumba nitihka pengelandik diri empu. Nya alai kita nembia rebak baru betuah laban bisi diberi peluang ngerembaika pengelandik diri empu. Kelimpah ari nya perintah bisi nyendiaka perengka lumba ti manah. Kita mega diberi peluang nampung pelajar dalam sekula lumba. Kemaya hari tu, lumba ulih nyadi siti kereja profesional



AKTIVITI

1. Keluluka tibak jaku di atas nya.
2. Tusui peneleba nuan senentang aktiviti tu ba sekula.
3. Peragamka penguntung ari aktiviti lumba ngagai kitai. Bantaika penemu nuan ngena kar runding segala rata.
4. Lumba ulih nyadi siti kereja profesional. Pejuraika penemu tu.

LATIH

Gaga siti ripot bepelasarka aktiviti lumba sekula kita taun tu.





Jalai Jaku

Keluluka randau di baruh tu.

Jenaing enggau Lawai benung berandau lebu ngetu tengah hari maya pengerami lumba darat sekula sida.

Jenaing : Nama berita Lawai?

Lawai : Manah ga, Aing. Nuan dih?

Jenaing : Akai, lelak amat. Baru udah belanda 200 meter tadi!

Nasit ga bulih lumur satu. Ngelama tu mina bulih lumur dua aja.

Lawai : Manah mih nya!

Jenaing : Terima kasih. Nama lumba ti dipasuk nuan dih, Lawai?

Lawai : Nikauka leka meriam. Nya sigi lumba ti dikerinduka aku. Apu, manah amat kasut spike nuan Aing!

Jenaing : Pia. Kasut spike tu dibeli aku ngena duit simpan aku empu. Diserepit ari belanja ke ngelama tu.

Lawai : Endang patut kitai bekelimat. Anang tak bumbus tapa enti apai indai meri kitai belanja.

Jenaing : Au, amat nya!



A K T I V I T I

1. Rintaika ayat ti ngundan jaku tekenyit enggau jaku tanya dalam teks.
2. Gaga tiga iti ayat penerang ti nerangka pengerami lumba darat ba sekula nuan.

L A T I H

1. Gaga tiga iti ayat tekenyit enggau tiga iti ayat tanya.
2. Bepelasarka randau di atas, nama reti sempama bumbus tapa?
3. Ba runding nuan, baka ni chara nyungkek kualiti lumba menua kitai?






Bungai Jaku

Pelandai Ngulihka Pemandai

Tumu pagi, teringkas siang
 Dani merus ngeli, lalu mandi ba dulang
 Ngirup kopi, lalu makai ruti gelang
 Sugu buk, ngena sugu **jarang**
 Belitka sementing, bansa tali belulang
 Betinjau ba cheremin, **sigat** baka apai Jang
 Aku nurun ke sekula, enggau ati **lantang**
 Pasukka tanchut, beg dipelawik ke belakang
 Pasuk baju, serak ngena baju sampang
 Indai mesan, macha bup anang kurang
 Neapan kerita, chat **lawa** mirah jerenang
 Kandang sekula, rampa lawa ati **teperansang**
Regas masuk kelas, bakih meri tabi memagang
 Mija tusun **sebaka**, nadai **betemera** melintang pukang
 Nemiak **chapuh ragak**, ati chukup **teperindang**
 Pengajar kelas **badas**, seruran disebut lalu dikenang
 Iya **tumu** ke kelas, nemiak chukup pengadang
 Nyawa iya **inggar**, didinga ari belakang
 Iya ga **nelap**, kami betanya nadai kakang
 Oh bala bakih, ngulihka pemandai anang bepampang
 Duit taruh mimit, **sebedau ujan datai kitai udah ngadang**
 Ngambika pengidup kitai, gerai nyamai lantang senang
 Maju nengeri Sarawak, belambangka burung kenyalang.



AKTIVITI

1. Sadaka pelandai jaku peransang di atas tu ngena intonasyen ti betul.
2. Tuliska ajar manah dalam pelandai jaku peransang di atas nya ngena kar gelembung.
3. Kerandauka reti ayat **sebedau ujan datai kitai udah ngadang**.
4. Ba penemu nuan, nama penyadi kitai enti enda bekelimat belanja?

LATIH

1. Terangka reti jaku adjektif ti bechura mirah.
2. Gaga lima iti ayat ngena jaku adjektif ti bukai.
3. Tengkebang siti entelian pelandai ti ngenang budi apai indai. Uдах nya, pandangka ngena kereban ICT.



Pengukuh

Seridi

1. Tipak timbal leka jaku di baruh tu.

Leka Jaku	Timbal
pagi	pisit
jarang	tusah
lantang	laun
tumu	niki
nurun	lemai

2. Isi lapang dalam ayat di baruh tu ngena leka jaku ti udah disediakan.

jarang

nerima

lemai

niki

apin

- a. Rajin amat Apai Radin gawa di kebun lada semadi nyau ... hari baru iya pulai.
- b. Nitihka adat basa kitai ari menya, ... niki ke rumah panjai bala temuai dulu nanyaka penyadi rumah.
- c. Ini aku rawan amat lebu ngumpul buah lada laban gigi tangga ti digaga aki kelalu ...
- d. Lebu beperesa ba klinik, pemutus peninggi darah Apai Lawai ... belama laban iya enda bepentika diri makai.
- e. Igat semampai ... jaku puji laban iya bagas gawa sereta selalu nulung orang bukai.



Pengaya

1. Tulis ayat ngena jaku adjektif di baruh tu.

sigat

regas

lawa

teperindang

betemera


nelap

2. Tusun baru ayat ba pelandai di baruh tu awakka nyadi entelian ti menyana.

a. Ngarapka mujur bulih pemandai
SK Batu Burak jelai rita
Selamat betemu selamat bekelala
Rampa menua badas ditimpai

b. Terebai beraban ngelawa tansang
Lemai hari pipit begau
Penemu beguna nyadi ke tenggau
Ngerandang jalai nuju pemansang

3. Gaga siti karang pelandai ke diri empu bepelasarka tema:
Siku Nembiak Siti Lumba.





Unit 4 Wi Tampung Tali, Rutan Tampung Danan



Aram Mending enggau Bejaku

Keluluka randau di baruh tu.

Helma enggau Suraya nemuai ngagai rumah Timai laban deka ngambi gambar pua kumbu dikena ngaga bup skrap.

Helma : Ibu, kami deka minta pemendar nuan ngambi gambar pua kumbu kita dikena ngaga bup skrap.

Indai Timai : Au, nadai salah. Nya iya dih.

Suraya : Terima kasih ibu. Mayuh pua kumbu udah ditunen nuan ibu?

Indai Timai : Bisi ga. Iya ke lama nya ditunen niang indai aku lalu nyadika pesaka kami sebilik.

Helma : Alus amat bekau jari niang indai nuan nih ibu. Kati nuan Timai bisi belajar betenun?

Timai : Bisi. Maya lepa aku belajar betenun ba indai aku.

Indai Timai : Amat nya, Timai endang rindu betenun. Enti seduai Suraya deka belajar, kitu mih maya lepa.

Suraya : Maya ujung minggu ila kami duai Helma belajar betenun ba nuan ibu.

Helma : Au. Aku endang udah lama deka belajar betenun.

Indai Timai : Manah mih nya. Awakka pengawa betenun ulih ditampung bala rebak baru indah enda baka wi tampung tali, rutan tampung danan.



1. Dalam raban, pejuraika reti rambai jaku “baka wi tampung tali, rutan tampung danan”. Bantaika asil jurai ngagai kita sekelas.
2. Ba runding nuan, nama kebuah pengawa betenun mesti dikeangkunka?



1. Tulis simpul penemu pasal randau di atas.
2. Ba penemu nuan, nama kebuah kitai mesti ngemeranka pengawa asil pengelandik jari? Bantaika penemu ba mua kelas.





Aram Macha

Bacha teks di baruh ngena intonasyen enggau ekspresyen ti betul.

Pua Kumbu

Pua kumbu tu siti ari pesaka asal kitai Iban. Kelia pua kumbu tu diasilka ari utai tumbuh baka lemba, taya, engkerebai, sebangki, tarum, engkudu enggau mayuh agi ke bukai. Sekeda ari perengka ti dikena orang betenun iya nya tendai, temeran, rakup, lidi, karap, lebungan, leletan, belia, tangga tenun, tangga ajan, tiang tenun, turak, sulat, tachu enggau tempaut.

Pua kumbu ngembuan mayuh bansa buah tenun enggau motif. Buah tenun ditengkebang bemothfka jelu, utai tumbuh enggau engkeramba. Sekeda ari nama buah tenun pua kumbu iya nya bali belumpung, bali berinjan, gumbang besimpan, ai bebuli enggau mayuh agi ke bukai. Nama buah tenun tu digaga nitihka motif iya.



Kelia pua kumbu dikena nyadi ke pua, nyambut indu beranak tauka sapat lebu bisi rabat. Diatu, pua kumbu enda agi nyadi ke pua dikena tinduk tang agi nyadi ke sapat ruai lebu bisi rabat. Pua kumbu tu mega dikena ngias ruai lebu maya bisi pemesai datai sereta maya pengerami gawai.

Mayuh temuai ari menua bukai rinduka pua kumbu. Sida suah meli pua kumbu nyadi ke tepa. Berindik ari nya, pua kumbu tu ulih ngemansangka dagang temuai menua kitai.


Diatu, ukai semina kitai Iban aja ngembuan pua kumbu tang mega dikembuan bansa bukai. Nya alai kitai mesti ngemeranka pengawa nenun pua kumbu ngambika iya enda lenyau dibai pengerarat jeman.



1. Ba penemu nuan, padahka nama penyadi enti pengawa nenun pua kumbu tu pupus.
2. “Pua kumbu ulih ngemansangka dagang temuai.” Pejuraika rambai jaku tu dalam raban.



1. Gaga kar segala rata pasal perengka dikena ngaga pua kumbu lalu bantaika ba kita sekelas.
2. Tulis siti genteran pandak pasal asil ari betenun baka selampai, baju burung enggau ke bukai.
3. Giga nama buah tenun pua kumbu kelimpah ari ti bisi dalam teks.





Aram Nulis

Bacha teks di baruh tu.

Aku Selambar Pua Kumbu

Aku selambar pua kumbu. Aku ditunen Ibu Racha ari sebuah rumah panjai di pelilih menua Julau. Ibu Racha tau disebut indu takar indu gar laban iya endang indu ti chukup tebilang ba pengawa betenun di Batang Julau. Barang sapa ti mansa ruai endur Ibu Racha ti nenun aku, nadai siku enda muji pengalus tenun enggau pemanah buah tenun ti dikarap Ibu Racha. Nadai mesa Ibu Racha nenun aku laban jari iya bengat jampat baka ke muar kesa. Uдах tembu, aku lalu dilipat sereta ditaruh iya manah-manah laban enggaika dikerit chit tauka diridangka indu gerinang.

Beserimbai enggau pengerami Lumba Perau ba Pasar Julau bisi diatur pengawa ngayanka asil ari pengelandik jari. Aku enggau bala menyadi aku ti bukai dibai Ibu Racha lalu diengkah ba kedai iya. Mayuh orang besun-sun ngelawa kedai Ibu Racha. Semua orang ti datai, enda ngira bansa enggau pengarap bela muji pemanah gamal aku.

Ari pemayuh temuai ti datai ngagai kedai Ibu Racha, tama orang putih melaki bini. Lama seduai melaki bini merening bala kami menyadi tang mih tachar perening bini orang putih nya tak lekat ba aku. Iya bayam pemanah aku lalu mai aku ngagai Ibu Racha sereta minta diskaun 10% ari tiga ribu ringgit rega aku ti udah ditetapkan. Ibu Racha setuju. Indu orang putih nya mayar rega aku ngena ringgit Malaysia ukai ngena mata duit Euro ti dikena di menua sida. Ati aku sinu laban beserara enggau kami menyadi kelebihan agi Ibu Racha ti diasaika baka indai aku. Taja pia, bisi ga ati aku gaga laban bepeluang diau di menua ti selalu dikelandikka ngelama tu.

Lebuh datai di menua Europa, tak enda sabar pengempu aku ti baru mandangka aku ngagai bala bakih iya. Sida bela muji pemanah motif enggau buah tenun aku. Aku berasai gaga sereta temegah ati.



1. Nama kebuah orang rinduka pua kumbu tu?
2. Berapa rega pua kumbu udah ti diberi diskaun 10%?
3. Ba penemu nuan, baka ni kitai ulih ngerembaika motif tenun ngagai pekayan bukai?



1. Tulis genteran ti keempat ngena tulis tampung.
2. Gaga karang prosa “Aku Selampai Berega”.





Jalai Jaku

Bacha jaku tapis di baruh tu.

Ngepan Indu Iban

*Keterubah iya deka masukka kain mirah
 baka darah mansau chechinang
 Udah nya iya masukka kain kebat nyau betekilap
 baka sempepat ngelambai petang
 Iya lalu ngena kain tating nyau sering-sering
 munyi naning ngelingi lubang
 Udah nya pasukka rawai rinyai
 maras di kerigai rusuk marang
 Iya ngena tumpa demam mayuh ripan
 ulih nanggam di lengan jari menchanang
 Tinchin belian bemata intan mau ngerang
 Deka ngena marik empang
 dilempai ba janga bau nukang
 Iya lalu ngelempaika selampai chukup ukir bechenagir
 baka naga benung nungaka rang
 Ngena sugu tinggi mesti ngelui ari lepi sanggul lintang
 Nya baru lubah nyingkang baka lingguk Endun Kumang*



Jaku figuratif mai reti ti besilup lalu jaku deskriptif mai reti penerang senentang pekara.



1. Liska jaku bantu gaya enggau jaku bantu aspek ti bisi ba jaku tapis di atas.
2. Kelala bagi leka jaku figuratif enggau deskriptif.
3. Ba runding nuan, nama kebuah rangka ngepan indu Iban berega amat?



1. Bantaika jaku bantu gaya enggau jaku bantu aspek ti udah diliska ngena kar kayu.
2. Liska leka jaku figuratif enggau leka jaku deskriptif ti bisi dalam teks.
3. Gaga ayat ngena leka jaku bantu aspek enggau leka jaku bantu gaya di baruh tu.

benung

udah

ulih

mesti

deka

Bungai Jaku

Sadaka jaku tapis di baruh tu.

Ajat Manggum Lesung

*Palu bebendai nyau ayun lundai
Pangkung engkerumung nyau merengung
Palu tawak nyau beanjak-anjak
Sida ke nembiaak duduk jenuh enda ragak
Tempap ketebung nyau begemung
Sebarang sapa ti ninga nadai bekira gagit ngajat*

*Dia tak enda berasai dih bujang biak
Ukai semina lempung dagu tang bagak
Nanggung pelepating nempap pah sepiak
Entepaka jari sambil kaki lalu ngentak
Pala dipelenggi lalu punggung gegayak
Ngajat di tengah ruai bekechepai naka pengelanchat*

*Dia iya lalu nyengkau lesung kayu tekam
Ke diban sida aya jengayang bujang ganggam
Chukup pemerat, manah dipeda lis diketam
Tak enda berupai dipelawik lalu dikanit ngeli gam
Chukup tegam kelalu rat enda bekinsit nadai beginyat*

*Iya nerais engkanjung nabanka lesung kayu medang
Musin menalan mata gegining jari megai duku ilang
Gamal dipeda jauh sigat ari antu buyu ngelambai petang
Dia baru iya ngengkahka lesung begadai pulai ke sarang
Ngelangkah meri basa ngagai mensia penuh dedat.*



AKTIVITI

1. Keluluka ajat manggum lesung nitihka penerang ba jaku tapis di atas.
2. Bantaika bansa ajat ti bukai ke ditemu nuan ba kita sekelas.
3. Ba penemu nuan, patut tauka enda main asal kitai dikemeranka?
Saraka penemu nuan.

LATIH

1. Padahka ajar manah ti bisi ba leka main di atas.
2. Liska kereban ti bisi dalam teks.
3. Ba runding nuan, baka ni chara ulih ngenanka main asal bansa kitai?






Pengukuh

Seridi

1. Giga enam leka jaku bantu dalam pitak urup di baruh tu.



2. Isi lapang ngena jaku adjektif ti engkeman.



Pelandai Pua Kumbu

Pua kumbu jelai nama ... rita
 Dikelala bansa serata menua
 Enda ngira adat, enda ngira bansa
 Dikena bala bujang dara
 Mirah ... baka tekang mau gemala
 Bemacham chura bemacham bunga
 Ditenun bala indu dara
 Nitihka mimpi padah Petara
 Ubung diikat ... ngena lemba rangkai
 Disepuh ampuh ngena engkerebai bebungai
 Ngambika chura berubah ... mata nimpai
 Kebatka ba tangga awakka ...
 Buah pua naka ... baka ke dirintai
 Ngambika dipeda temuai datai
 Sereta ke pesaka bansa kitai.



Pengaya

1. Bacha cherita di baruh tu.

Terubah Bansa Iban Nemu Bekelingai

Menya bisi kitai Iban siku benama Gendup. Iya rindu nyumpit. Nyadi sekali iya tepejuh nyumpit ke pendai orang, lalu tepedaka indu siku benung mandi. Indu nya lalu nyapa iya. Udah tembu mandi indu nya lalu mai Gendup niki ke rumah.

Nyau semak kaki tangga, dinga Gendup tak bekesetik munyi utai dalam rumah orang nya. Iya enda nemu belabaka pengawa orang ke bengat bekesetik ngemalat nya. Gendup nanya ngagai indu nya. Indu nya madahka sida serumah ngaga pantang.

Udah badu makai lemari orang serumah dia ngulu Gendup. Sida nanyaka menua enggau pejalai Gendup laban iya nadai kala rembus ba menua nya. Gendup madahka diri pejalai lantang. Ninga iya pejalai lantang dia sida ke bujang lalu deka ngaga kelingai ke dikena ngingatka iya ke baru rembus. Malam nya sida ke tuai lalu madahka Gendup bagi kelingai ke diengkah ba tubuh. Orang mega lalu madahka pasal tegulun ngagai iya. Tegulun enda tau digaga ngapa enti nadai dengah.

Hari siti iya madahka diri deka dipantang sida. Tiga hari berunggu sida mantang Gendup nya baru tembu. Naka pemanah kelingai ba sebelah tubuh Gendup laban orang ke mantang nya endang landik. Sida dia endang pun penatai pengawa bekelingai. Apin Gendup pulai, apai tuai orang nya lalu madahka nama diri Selang Pantang lalu sida serumah nya endang Antu Pantang magang-magang. Antu Selang Pantang nangkan Gendup mesti ngajar peturun iya bepantang laban iya mensia ti keterubah datai di rumah sida lalu bepantang.

Datai Gendup di menua, sida serumah bela ngenung meda utai tak begenarau chelum sebelah tubuh iya. Iya becheritaka diri ke kala begulai diau enggau sida Antu Selang Pantang. Bepun ari ajar Gendup nya mih kitai Iban nemu begagaka kelingai ba tubuh.



(Dibali ari: <https://gnmawar.wordpress.com>)


2. Saut tanya di baruh tu.

- Dini endur Gendup tepejuh maya iya nyumpit?
- Sapa ke nanya Gendup ba pendai nya?
- Nama pengawa ti benung digaga orang rumah panjai nya lebuah maya Gendup datai dia?
- Ba runding nuan, nama kebuah orang ti rembus ba menua Antu Selang Pantang nya digagaka sida iya kelingai?




 **Tisih**

1. Liska jaku bantu aspek enggau jaku bantu gaya ngena kar kayu.



2. Gaga ayat ngena jaku bantu aspek enggau jaku bantu gaya ti udah diliska nuan.
3. Beri penemu nuan senentang tanya di baruh tu lalu bantaika ngena kar berurun-rurun.





Unit 5

Cherita Nyadi ke Teladan





Mending enggau Bejaku

Perati lalu kerandauka pengawa dalam gambar di baruh tu.



SK Batu Burak

Pekit Drama 2016



Dulu kelia bisi dua iku jelu ti bebakih amat. Seduai iya begulai manah enggau pangan diri lalu semampai betawing kin kitu baka belangkas.

A K T I V I T I

1. Tipak dialog di baruh enggau pengelulu ti engkeman.

- Oh! Ni nuan jui? Tu aku ti bejulukka batu penemu jauh runding ngelui remang. Pintar betimbang, akal enda kurang. Aram tua mupuk baka selama begigaka engkayu sebelah kampung puang.
- Tu aku jui ti beensumar sambu lubah bejalai tang nadai penimpang, pandak singkang tang ngembuan kerubung kering pengelamun tulang. Aram mih ari tadi aku nganti nuan.

- Kelala bagi sempama, emperian enggau jejuluk tauka ensumbar ti bisi dalam dialog nya.
- Ba penemu nuan, baka ni gaya kaul antara Tekura enggau Pelanduk kelimpah ari dalam dialog?
- Bepelasarka peneleba nuan, nama penguntung ari ngemeranka kaul ti manah enggau pangan diri.



L A T I H



- Tuliska emperian enggau ensumbar ti ditemu nuan.
- Beri situasyen dalam pengidup kitai ti bemalinka kaul antara Pelanduk enggau Tekura baka dalam dialog di atas.





Aram Macha

Bacha cherita di baruh tu ngena kelis mua enggau lingguk tubuh ti engkeman.

Engkadah ke langit peda mua hari petang tegayam.
Nadai bintang pegari ngias malam. Bala jelu semua
agi bela betugung, sama berundingka penanggul ti
nuntung sida.

Nganti pagila aja mih kitai,
anang beguai mindah ke bukai.

Enti ujan lagi, tusur tanah tabanka ai nelusur
bukit. Kami tu mit, rarat lagi tabanka ai datai
ngenyit. Nyau **asaika digenggam semengat**.

Abis kampung puang ditebang enda beradat.
Mimit ujan ai sungai lalu mansang. Tanah
tusur nabanka kayu tumbang.

Suba nadai
penusah baka
tu. Sekumbang
kampung ti majak
kurang, kitai pedis
ngiga pemakai.
Endur diau pan
sebarang alai.


Kami semua enda engkeretik. Semua bela berunding. Enti mindah
ke ulu tanjung, nadai agi kampung puang endur belinding.
Temuda pan pedis digiga. Udah nyadi emperan bandar raya.
Ngejang ke ili pan bedau temu **senuah untung**. Din balat agi endur
anak mensia begenturung.

Mindah dulu mih kitai ngagai tanah landai. Mupuk bejalai begadai-gadai. Barang
ke besai ngema sida ke mit. Sapa ke laju nyingkang ngesan sida ti lubah bejalai.
Enti sema kitai lelak, ngetu ga enda lama. Enti sema kitai lepi ikak, bela bebagika
pemakai sama seempa.



Amat munji ku Tengiling nya. **Merekah pajar** lagi aku terebai matau ngiga pulau galau anak mensia. Dia endur kitai **mubuk kampung**. Anang irau, punggal. Enda ditegu sida pulau galau nya.

Semua bala setuju magang. Tekerebak tawas kami ngepuka singkang. Kami mindah begigaka kampung galau anak mensia. Taja pia, kami agi ngenang bala bakih ti mengkang tinggal di menua lama din.




AKTIVITI

1. Terangka isi cherita ngena kar rurun.
2. Kerandauka reti sempama ti bechura mirah dalam cherita di atas.
3. Pejuraika empas ari pengawa ke nebang kayu enda beradat ngagai pendiau enggau pengidup kita.
4. Ba penemu nuan, terangka baka ni chara kitai nagang pengawa nebang kayu enda beradat?
5. Nama penyadi menua kitai enti pengawa nebang kayu enda beradat enda besekat?

LATIH

1. Giga dua iti jaku sempama ti engkeman enggau cherita tu.
2. Rintaika tiga iti ajar manah ti bisi dalam cherita nya.
3. Tulis siti karang belalauka gambar di baruh.




2.1.5
2.4.1

35



Aram Nulis

Tengiling nulis surat elektronik ngagai bakih iya, Ruai. Bacha surat di baruh tu.



AKTIVITI

1. Kelala bagi bansa ayat dalam surat elektronik nya.
 - a. ayat penerang
 - b. ayat tekenyit
 - c. ayat tanya
 - d. ayat perintah
2. Gaga ayat ungkup tetiap bansa ayat di atas.
3. Bidaka rampa menua entara kampung asal sida suba enggau taman negara nya nitihka penerang dalam surat elektronik ngena kar gelembung gandin.
4. Ba penemu nuan, nama kebuah Tengiling madahka diri berasai nyamai? Beri penerang ti silik ke penemu nya.

LATIH

Tulis segenteran karang ti nerangka bida entara rampa menua baru enggau menua lama sida.






Jalai Jaku


Ah Meng meli bup cherita ke tepa bakih iya ti diau ba menua bukai. Bacha tibak cherita ari bup nya.

Majang seduai Balang ditinggalka apai indai kenyau ari mit udah ke bebadi diserang burung geruna. Seduai ngidupka diri lalu diau dalam sebuah gua muak ke barat menua Lubuk Bebatu. Gua nya enda jauh ari sebatang sungai ti alai begigaka pemakai. Ngelingi gua nya mega endang mayuh utai tumbuh ti tau ke **engkayu**. Seduai nadai penyuntuk utai kena laban seduai nemu ngaga mayuh macham pekakas baka selabit, idas, bubu enggau kereban bukai. Semua pekakas nya berupai manah laban seduai iya sama **alus jari**. Seduai mega **enggai enda jenuh jari** laban nemu nadai orang bukai dikarapka agi. Balang ngembuan **juluk ati** ti tinggi. Pagi siti, iya duduk nyandih ba bandir sepun tapang. Pemesai pun tapang nya bulih dua pemerap. Iya berunding deka mai Majang mejuh ngichaka bisi tetemuka menua ti diuan mensia. Malam nya Balang madahka **anak runding** diri ngagai Majang. Majang lalu ...



A K T I V I T I

1. Kelala bagi jaku prafrasa ti bisi dalam tibak cherita nya. Bantaika ngena kar kayu.




2. Kerandauka reti jaku silup ti bechura mirah dalam teks.
3. Enti nuan Ah Meng, nama sekeda pekara ti patut dikira sebedau nuan meli bup cherita nya?
4. Rega asal bup nya RM8.00 siti tang bisi diberi diskau 20%. Berapa rega bup ti patut dibayar Ah Meng?





1. Saut tanya di baruh.
 - a. Dini endur cherita tu nyadi?
 - b. Nama penguntung enti kitai enda jenuh jari?
 - c. Nama runding Balang ngagai menyadi iya?
 - d. Nitihka penemu nuan, beri pengudah cherita tu.
2. Tusun urup di baruh tu ngambika nyadi jaku penempat.



3. Tulis ayat ngena pengenap tesa di baruh.



4. Isi lapang di baruh ngena jaku silup ti bisi dalam teks.
 - a. Lemai tadi aku enggau indai ke kebun lalu ngiga daun sabung enggau daun empasa. Nya mih ke ... kami malam tu.
 - b. “Belajar bebendar, Igat. Tapatka ... nuan. Nuan mih ke tulang belakang kitai sebilik,” ku apai. Jaku nya meruan dikingatka Jalin taja pan iya diatu udah mujur.
 - c. Kami sekelas ngulu pemandang asil pengelandik jari kemari. Mayuh macham kereban ti memamah dipandangka. Orang ke empu abi jari tu sigi ...
 - d. Pemujur Aya Buda dalam industri betanam betupi patut nyadi ke teladan kitai. Iya ukai semina ... tang ngembuan juluk ati ti tinggi deka ngemujurka diri dalam industri tu.






Bungai Jaku

Bacha sereta keluluka ensera di baruh tu.



“Oh, bala anak! Petara udah nempa anak mensia ti sama ngembuan pengelandik bejaku baka kitai. Nya alai kitai diasuh ngiga jaku bansa diri empu. Gaya pengidup ngelama tu mega dilengka. Kita diberi awak seminggu begigaka jaku baru. Minggu nyin ila kitai betemu baru ditu,” pia ku Penyaga Kampung.

Dulu kelia, kenu ku jerita, semua jelu nemu bejaku baka mensia. Bala jelu mega idup begempung sereta betulung enggau pangan diri. Hari siti, Penyaga Kampung ngangauka semua jelu begempuru.



Hari beganti hari tang Tiung bedau begigaka jaku bansa diri. Iya semampai ketawa ke bala bakih aja.

Bala jelu bekekisuk begigaka jaku bansa diri. Singa digela Raja Kampung ti keterubah milih jaku bansa diri.

“Auuumm, tu munyi dipilih aku,” ku Singa. Semua jelu setuju magang semina Tiung aja ti ngelese.

“Hahaha, munyi beruang pedis ngeli,” ku Tiung sambil ketawa.

Singa enda bemunyi laban sigi nemu ulah Tiung baka nya.





5.

Genap timpuh seminggu, bala jelu begelumu baru. Semua jelu ngayanka jaku diri. Datai ba gintir Tiung iya lalu bejaku.

“Mbeek,” ku Tiung tang Kambin madah nya jaku iya.


“Muuu,” ku Tiung tang Chapi mantah laban nya jaku iya.

“Miau,” ku Tiung nguji baru lalu dianu mayau laban nunda jaku iya.

“Hahaha, munyi pintu ti enda diberi minyak,” ku Tiung nganu Buntak.

“Hahaha, dinga kita munyi nyawa bala ini tuai ketawa,” pia ku iya nempika munyi jaku bala Kuda.

“Apu! Gelembung sapa ti bumbus nya?” ku iya ketawa ke munyi Ular.



6.

Semua jelu ketawa meda Tiung. Iya berasai malu lalu minta ampun ketegal penyalah diri ti udah ngeleseka sida.

“Umbas nya bala anak. Nuan Tiung tetap beri aku siti jaku. Nyadika ajar, nuan deka lanchat nunda munyi jaku jelu bukai selama-lama iya,” ku Penyaga Kampung sambil tuchum.

(Dibali ari: Surayah Hussin, *Haiwan Bijak Bersuara*, 2009, Lambar 172-174)

AKTIVITI

1. Nama penemu nuan senentang ulah Tiung?
2. Pejurai lalu tuliska ajar manah dalam kar gelembung.
3. Uji peragamka situasyen pengidup kitai kemaya hari tu enti semua jelu ulih bejaku baka mensia?

LATIH

1. Tulis lima iti ayat ti nerangka ajar manah dalam ensera tu.
2. Ba runding nuan, nama pekara ti ngerinduka ati dalam ensera tu?

Pekara ti ngerinduka ati aku dalam ensera tu iya nya ...



Pengukuh

Seridi

Bacha poster di baruh lalu pindahka penerang dalam pitak ti disediakan ke dalam bup latih nuan.

ENSERA JELU BELELANG



Rega: RM10.00

Endur Meli: Kedai Bup Tebilang
Diskaun: 10%

Batang Ensera:

Jelu belelang ngiga kampung galau ti baru nyadika palan endur diau.

ENSERA PELANDUK ENGGAU TEKURA NUMBIT BANDIR TAPANG



Rega: RM8.00

Endur Meli: Kedai Bup Jelai
Diskaun: 5%

Batang Ensera:

Pemintar Pelanduk enggau Tekura menang dalam pekit numbit bandir tapang.

Topik Bup	Ensera Jelu Belelang	Ensera Pelanduk enggau Tekura Numbit Bandir Tapang
Rega (RM)		
Diskaun (%)		
Endur Meli		
Batang Ensera		

Pengaya

- Bepelasarka penerang ba poster di atas, ni bagi bup ti dipilih nuan? Tuliska kebuah nuan milih bup nya dalam bup latih.
- Bepelasarka peneleba, pilih siti bup cherita ti kala dibacha nuan. Tuliska penerang senentang pekara di baruh tu.
 - watak
 - sinopsis
 - ajar manah
 - pekara ti ngerinduka ati






Tisih

1. Gaga ayat ngena jaku sempama dalam pitak di baruh tu.

senuah untung	asaika digenggam semengat
merekah pajar	mubuk kampung

2. Kelala jaku penempat ti bisi dalam ayat di baruh tu.
 - a. Pulau galau ti ditapatka bala kami sebuat nya apak ke barat.
 - b. Bala jelu udah datai ba tengah kampung. Sida udah mutus ati deka ngelawa kampung galau anak mensia.
 - c. Aku nudukka diri ngimbai Suraya ke benung ngirup ba baruh pun kayu ti rinda. Aku lalu mansutka bekal ari beg.
 - d. Seraban temuai ari menua luar neruska pejalai sida nuju endur ti bisi bungai rafflesia. Endur nya enda jauh ari Gua Layang.
 - e. Taun tu kami bumai ba temuda Nanga Embawang senentang kami berimba sepuluh taun menya. Bungkur pemesai temuda nya ari tebing sungai nyentuk ke ngagai kaki Bukit Embawang.
3. Tulis baru genteran ayat di baruh tu ngena tanda bacha ti betul. Kelala bagi bansa ayat ti bisi dalam teks nya.

pagi siti aku duduk ba tisi pegung aku nyinuk ngemataka ikan dalam pegung nya enda mukai mukai aku ninga nyawa orang nyerauh muak ke seberai jalai
tulong tulong tulong pia ku munyi nyawa
mata aku gining-gining ngiga orang ke minta tulong aku malik ke kiba siku orang tuai teduduk ba tanah pala iya bedarah aku belanda ngelawa ini tuai nya
apu lapa nuan ini ku aku
iya madahka diri terap udah nya aku nulung iya berdiri terima kasih uchu laban udah nulung aku ku iya sebedau mupuk iya bepesan ngasuh aku bejimat ba rantu jalai





Pengeliat Ati Mai Pemujur



Aram Mending enggau Bejaku

Peratika gambar ti mandangka pemujur apai Banyai bekebun lada di baruh tu.



A K T I V I T I

1. Betanya saut bepelasarka gambar di atas.
2. Peratika situasyen dalam gambar C. Gaga ayat ti engkeman dikena meransang orang nyimpan duit ba bank.
3. Ba runding nuan, baka ni chara bala pekebun tau mujur?

L A T I H

1. Tulis tiga iti ayat ti engkeman dikena meransang nemiak rebak baru ngemeranka pengawa betanam betupi.
2. Ba runding nuan, nama kebuah apai Banyai mujur bekebun lada?
3. Gaga kar segala rata ti nunjukka kebuah apai Banyai mujur ba pengawa betanam betupi.





Aram Macha

Bacha cherita di baruh ngena intonasyen ti betul.

Ba Pengerami Hari Orang Bumai Tikas Menua Sarawak ke diatur empai lama ti udah, Linggi Anak Sagoh nerima perais Anda Betanam Betupi 2015. Tu ke nyadi buah mulut sida semenua. Pemayuh mensia ti ngulu pengerami nya suba baka ulat garam



nyengkaum bala menteri, pemesai ari Opis Betanam Betupi, tuai-tuai opis perintah enggau tuai-tuai raban bansa.

Iya ke bendar Linggi tu suba endang orang ti merinsa. Maya betangkal getah iya palu basu lalu maya bumai enda pulai benih baka pengidup manuk kair pantuk. Taja pia, iya benasit laban bisi diungkupka entua iya sebidang tanah ti umbas iya pemesai. Maya nya suba, bini iya Isah agi betampung benung beranak mit, kelalu pisit baka sit buah pisang.

Suba Linggi enda belada laban enda teulihka tuat lada. Deka beragih orang enggai, deka meli duit ga nadai. Tang jaku peransang ti dipansutka apai pejalai beribu batu bepun ari singkang

iya selalu dikeingatka iya nyentuk ke diatu, **keterubah**. Iya bechuanka pemujur Tauke Abong ti nyulut dalam pengawa dagang ke ngembuan mayuh buah rumah batu di Bandaraya Miri.

Bebekalka pengeliat ati, Linggi lalu mupuk bekebun mimit-mimit. Iya meras ngereja pengawa nyentuk ke enda begari rangkai. Nyau kelama udah nya, Linggi bisi nerima bantu ari Opis Lada enggau Opis Betanam Betupi. Sida mantu meri perengka dikena bekebun baka baja, rachun, pemanchit enggau sekeda kereban ti bukai. Kelimpah ari nya sida mega bisi meri latih senentang chara bekebun lada.



Kelimpah ari ti bebendar bekebun lada, iya mega enggau naka ulih nyengulaka semua lima iku anak iya. Linggi enggau naka ulih meransang sereta nyeridika pelajar anak laban meretika pemesai guna pelajar sekula.

Diatu semua lada iya bisi tiga ribu pun lalu ulih ngasilka penatai pemisi lebih kurang RM200,000.00 dalam setaun. Pengawa bekebun muntang dikereja laban sekeda pengawa baka manchit, mantun enggau ngigirka buah lada mayuh udah ngena injin. Nambahka nya, Linggi diatu udah dibantu dua iku orang gaji ngereja pengawa.

Semua anak seduai udah mujur dalam pelajar lalu megai pengawa ke menyana ba perintah enggau kompeni. Banyai nyadi lutur. Jilan nyadi luyar. Meling nyadi polis lalu Umang Ensingan nyadi pengajar. Semina siku Radin aja ti agi besekula.

Diatu pendiau enggau pengidup sida Linggi sebilik jauh udah berubah indah enda baka lansar bebali nyadi lubuk.



A K T I V I T I

1. Kelala jaku figuratif dalam cherita di atas.
2. Kerandauka reti, pejalai beribu batu bepun ari singkang keterubah.

L A T I H

1. Rintaika ukur pemanah ti bisi dalam cherita di atas.
2. Terangka reti jaku sempama ti bisi ditemu dalam cherita di atas.
3. Tuliska penteba ulah manah Linggi Anak Sagoh ti nyadika chunto manah ngagai kitai dalam kar runding segala rata.






Aram Nulis

Peratika sereta bacha enggau silik biodata di baruh tu.

Nama : Linggi Anak Sagoh
Umur : 52 taun
Bansa : Iban
Penatai : Rumah Engkaul, Madu Midang
Nama bini : Isah Anak Sempurai
Pemayuh anak : 5 iku
Peninggi pelajar : (Pom 3) Lower Certificate of Education (LCE)
Endur sekula : SK Batu Burak (Primari I ngagai Primari 6)
SMK Batu Burak (Pom I ngagai Pom 3)



Pengawa : Betanam lada
Kelab dipasuk maya besekula : Kelab Husbandri (Chairman)
Setipikit diterima maya besekula : 1. Kaban Kelab Husbandri Pengabis Chakah
2. Pemenang Pekit Pemanah Kebun Sayur
Peringkat Menua Subis 1978
Penatai pemisi setaun : RM200,000.00
Kus ti kala dipasuk : 1. Chara Nanam Lada
2. Chara Nyaga Penyakit Lada
3. Enterpreneur Rebak Baru
Anugerah : Anda Betanam Betupi 2015
Juluk ati : Deka nyadi kontraktor ti mujur



1. Kerandauka biodata di atas dalam raban.
2. Enti nuan Linggi diatu, baka ni chara nuan meransang nemiak rebak baru rinduka pengawa betanam lada?
3. Ba runding nuan, nama kebuah Linggi deka nyadi kontraktor?



Bepelasarka biodata Linggi Anak Sagoh di atas, tulis siti karang pasal pengidup iya.



Jalai Jaku


Bacha teks di baruh lalu peratika chara ngena penambah mua pe- enggau penambah peN-.

Tan Sri Bantin Anak Sagoh siku orang dagang ti tebilang. Iya menyadi tuai Linggi anak Sagoh, penanam lada ti maju amat. Pemujur iya numbuhka Supermarket Sagoh Enterprise udah ditemu orang mayuh. Iya udah napi mayuh penusah enggau penguji sebedau mujur dalam dagang nya. Iya selalu ingatka ulah tekura ti enda mudah mantul ngapa enti apin tepantup ba bandir.

Taja pan iya enda ngembuan pelajar tinggi tang iya bisi ngembuan pengelandik enggau pemintar ba pengawa dagang. Kelimpah ari nya, iya mega ngembuan adat basa enggau penelap ati ti dikerinduka orang. Chukup pemedis iya berubah numbuhka supermarket nya suba.

Pemujur pengidup iya ari ke semina muka kedai mit nyentuk ke muka supermarket ti ngembuan mayuh pampang tau amat nyadika peransang kitai ke rebak dudi. Iya udah dipilih nerima perais enggau setipikit 'Usahawan Contoh 2011'. Iya mega selalu dikangauka meri jaku peransang ngagai nemiak ti benung belajar.

Kelimpah ari nya, iya mega selalu gerah jari meri duit jali ngagai bala nemiak ari ruang bilik ti merinsa mensena.



A K T I V I T I

1. Giga lalu rintaika leka jaku bepenambah peN- enggau pe- dalam teks.
2. Kelala bagi urat jaku dalam jaku bepenambah nya.
3. Rintaika ukur pemanah dikembuan Tan Sri Bantin ti ulih mantu iya mujur dalam pengawa dagang.
4. Nama juluk ati nuan? Peragamka chara nuan ngemansangka diri ngambika ulih nyapai juluk ati nya. Tulis chara nya ngena kar gelembung.

L A T I H

1. Isi endur lapang ngena jaku penambah belalauka urat jaku dalam engkerung.
 - a. ... (mujur) iya ba pengawa dagang nyadika pengeransing orang rebak dudi.
 - b. Chukup mih ... (tusah) Tan Sri Bantin terubah iya muka dagang suba.
 - c. Iya ngembuan ... (landik) dalam pengawa dagang.
 - d. Pemujur iya ba pengawa dagang suba endang sigi bepun ari iya ti ngembuan ... (nelap) ati enggau bala orang ti bekereja ari baruh iya.
 - e. Bala ... (beli) barang diatu udah ngembuan chukup pengelandik bebelanja.
 - f. Tan Sri Bantin napi ... (pedis) enggau penguji maya ti baru numbuhka supermarket suba.
 - g. ... (datai) Tan Sri Bantin ba sekula SK Batu Burak disambut enggau chukup basa.
 - h. ... (jalai) pengidup Tan Sri Bantin tau bendar nyadi teladan bala kitai rebak dudi ti nguji deka muka pengawa dagang.
 - i. ... (gawa) Tan Sri Bantin balat dikenang rayat mayuh laban iya ukai semina orang dagang ti mujur tang ngembuan penyiru ati ngagai semua orang.
2. Isi jaku sempama ti engkeman dalam ayat di baruh tu nitihka chara iya dikena ba teks nya tadi.
 - a. Ulah Tan Sri Bantin ti enda mudah mantul ngapa napi penusah maya muka dagang disemaka baka
 - b. Tan Sri Bantin tebilang di menua sida laban iya ... mantu orang ti suntuk belanja.
3. Rintaika ukur pemanah ke bisi ditemu dalam cherita Tan Sri Bantin Anak Sagoh.



Bungai Jaku

Sadaka pelandai di baruh tu.

Pengeliat Ati

Pun pengidup chukup penusah
Ngiga belanja betangkal getah
Sebarang pengawa nadai diseliah
Anang ngereja pengawa ti salah

Keterubah betanam lada
Nadai tambak, tuat enggau baja
Gawa siang malam enda ngira maya
Kengka asil ke belanja anak besekula

Anak lima iku benung belajar
Dipadah nadai mantah rajin sereta pintar
Diatu sida gawa lalu diau di bandar
Nyadi lutur, luyar, polis enggau pengajar

Pengidup kami duai melaki bini lantang
Bala anak bisi kereja perintah enggau bedagang
Kebun lada enda jena bisi beberapa bidang
Pengawa berat nadai ngangkat kereja kuli magang

Pesan aku ngagai kita rebak dudi
Ngambika kita enda nesal dudi hari
Ngereja pengawa mesti liat ati
Pengidup mujur nupi anak bini.



AKTIVITI

1. Bacha leka main di atas sambil beratika enteli ba tetiap baris.
2. Kerandauka enggau pengajar chara nengkebang karang pelandai di atas.

LATIH

1. Tuliska semua ukur pemanah ba leka main di atas ngena kar segala rata.
2. Betanam lada tau ngasuh kaya. Pejuraika.















Pengukuh

Seridi






- A. Giga timbal leka jaku dalam ayat di baruh tu nitihka jalai iya dikena dalam teks ti udah dibacha ba lambar 44 enggau lambar 45.

No.	Leka Jaku	Timbal
1.	mayuh	 ...
2.	merinsa	 ...
3.	meli	 ...
4.	nadai	 ...
5.	muntang	 ...

- B. Tulis ayat ngena leka jaku di baruh tu:

<input type="radio"/>	1.	bakih	 ...
<input type="radio"/>	2.	meras	 ...
<input type="radio"/>	3.	keterubah	 ...
<input type="radio"/>	4.	bebendar	 ...
<input type="radio"/>	5.	pemayuh	 ...
<input type="radio"/>			

- C. Isi lapang di baruh tu ngena leka jaku ti engkeman ari latih B di atas.

1. Amat raya ga  orang bebelika barang ba kedai nya lemai kemari.
2. Aka aku orang ti  ulih nampung pelajar ngagai universiti ari menua kami.
3. Chukup  ati aku disangka Wat Kalum enchuri duit dalam kerepai iya.
4. Tetiap hari, kami duai  aku Jenaing sereta nurun ke sekula.
5. Apai aku enggai nangguhka pengawa, nya alai iya  lebu ngereja pengawa.



Pengaya

1. Isi kar di baruh tu belalauka biodata Linggi Anak Sagoh.

Umur	Pemayuh anak	Peninggi pelajar
Penatai		Juluk ati
Nama bini	Pengawa	Tanda puji diterima

2. Tipak sempama di baruh tu enggau reti iya ba sepiak.

Gerah jari	Bebendar ngereja pengawa nyentuk ke tembu.
Buah mulut	Pengidup ti merinsa berubah nyadi senang.
Lansar tau nyadi lubuk	Enda ngenyadi lalu mentas mantu tauka nulung orang.
Baka pengidup manuk kair pantuk	Pekara ti selalu dikenang orang belama.
Enda begari rangkai	Pengidup orang ti kelalu merinsa.
Baka tekura enda mudah mantul ngapa enti apin tepantup ba bandir	Orang ti kelalu bendar gawa.

3. Tulis ayat ngena jaku sempama di baruh tu.

- Buah mulut
- Enda begari rangkai
- Baka tekura enda mantul ngapa enti apin tepantup ba bandir



 **Tisih**

A. Beri tanda bacha ti betul ba teks di baruh tu.

ba pengerami hari orang bumai tikas menua sarawak ke diatur empai lama ti udah linggi anak sagoh nerima perais anda betanam betupi 2015 tu ke nyadi buah mulut sida semenua baka ulat garam pemayuh mensia ti ngulu pengerami nya suba nyengkaum menteri bala pemesai ari opis betanam betupi tuai-tuai opis perintah enggau tuai raban bansa

B. Nulis biodata.

Gaga siti pansik pasal siku orang ti mujur dalam pengidup lalu tulis biodata iya nitihka format ti betul.

C. Leka jaku bepenambah peN- enggau pe-

Tulis lima iti ayat ti ngundan leka jaku bepenambah peN- enggau pe- kelimpah ari ti bisi dalam teks ti udah dibacha.

D. Tulis lima iti ayat tanya bepelasarka situasyen dalam gambar di baruh.

